

四庫全書

史部

欽定四庫全書

史部

元經卷二

詳校官編修

臣范來宗

洗馬臣王坦修覆勘

總校官庶吉士

臣朱鈐

校對官侍讀

臣王家賓

謄錄監生

臣陳炳

欽定四庫全書

史部二

元經

編年類

提要

臣等謹案元經十卷舊本題隋王通撰唐薛

收績併作傳宋阮逸注其書始晉太熙元年

終隋開皇九年凡九卷稱為通之原書末一

卷自隋開皇十年迄唐武德元年稱收所續

晁公武讀書志曰案崇文無其目疑阮逸依

託為之陳振孫書錄解題曰河汾王氏諸書  
自中說以外皆唐藝文志所無其傳出阮逸  
或云皆逸偽作也唐神堯諱淵其祖景皇諱  
虎故晉書戴淵石虎皆以字行薛收唐人於  
傳稱戴若思石季龍宜也元經作於隋世太  
興四年亦書曰若思何哉今考是書晉成帝  
咸和八年書張公庭為鎮西大將軍康帝建  
元元年書石虎侵張駿公庭即駿之字猶可

曰書名書字例本互通至於康寧三年書神  
虎門為神獸門則顯襲晉書更無所置辨矣  
且於周大定元年直書楊堅輔政通生隋世  
雖妄以聖人自居亦何敢於悖亂如是哉陳  
師道後山談叢何遠春渚紀聞邵博聞見後  
錄並稱逸作是書嘗以稿本示蘇洵遠與博  
語未可知師道則篤行君子斷無妄語所記  
諒不誣矣逸字天隱建陽人天聖五年進士

官至尚書屯田員外郎宋史胡瑗傳景祐初更定雅樂與鎮東軍節度推官阮逸同校鍾律者即其人也王鞏甲申禠記又載其所作詩有易立太山石難芳上林柳句為怨家所告流竄以終生平喜作偽書此特其一耳文獻通考載是書十五卷此本止十卷自魏太和以後往往數十年不書一事蓋又非阮逸偽本之全矣明鄧伯羔執穀稱是書為關朗

作朗北魏孝文帝時人何由書開皇九年之事或因宋人記闕朗易傳與此書同出阮逸偶然誤記耶其書本無可取因自宋以來流傳已久姑錄存之而參考諸說附糾其依託如右乾隆四十五年正月恭校上

總纂官臣紀昀臣陸錫熊臣孫士毅

總校官臣陸費墀





元經原序

元經始晉惠帝終陳亡凡三百年蓋聞夫子曰春秋一

國之書也以天下有國而王室不尊乎故約諸侯以尊

王政以明天命之未改

夫子文中子也周王法

元經天下之書也

以無定國而帝位不明乎徵天命以正帝位以明神器

之有歸

春秋一國總乎周故孔子因魯史以明周之天命未改也元經天下歸乎帝故仲淹因神器以

明帝位必正也

又曰春秋抗王而尊魯其以周之所存乎元經

抗帝以尊中國其以天命之所歸乎

聖人筆法與天命齊致

然帝

衰於太熙

太熙晉武帝末年

故元經首此振起之也中國盛乎

皇始

皇始後魏年號

故元經摯名以正其實嗚呼天下無賞罰

三百載聖人在下則追書褒貶以代其賞罰斯周公典禮使後王常存而行焉仲尼筆削使後儒常職而述焉收受經於夫子何足以究其渾奧輒為傳解發明師訓之一二云薛收撰

欽定四庫全書

元經卷一

隋 王通 撰

唐 薛收 傳

宋 阮逸 註

經晉太熙元年春帝正月

武帝太康十一年惠帝即位改太熙元年又改永熙夏

四月立太后楊氏賈氏為皇后五月辛未葬武皇帝丙

子太傅駿輔政秋八月壬午立廣陵王通為皇太子以

何劭王戎楊濟為師傅冬十月石鑒為太尉隴西王泰

為司空屯兵四出

傳曰經者正也常也天以南北為正聖人以典禮為

常皆謂之經者天人相與為法也

經取天之正為本聖人以常為法

晉者司馬氏始封之國也帝自晉王受魏禪故國號

晉

司馬宣王河內溫人溫晉地也故啟封

太熙年號也帝謂惠帝也文

中子曰帝之不帝久矣

秦兼三皇五帝而傳非其道也尊虛名而已故曰不帝

挈名索實此不可去

春秋書王所以尊周也元經書帝所以正國中元

改元

立號非古也

古者國君始即位則稱元年無改元之禮自漢有初元中元之號後世因之此

亦不其於彼必自作之乎後漢自作年號不必盡取古故書年號

帝稱名沿漢舊制也

經書晉者本中國號也太熙元年帝正月者存舊制也

皇帝司馬氏太康十一年四月崩是月惠帝立經書

帝而不書即位微旨也曷謂微旨曰春秋之法隱莊

閔僖皆有故不書即位之禮或讓而不為

公羊傳曰隱公讓桓

之或痛而不忍

穀梁曰先君不以道終是以不言即位

或亂而不成禮

左氏曰閔公不書即位亂故也

或出而闕書或踰年而追書

左氏曰僖公不

稱即位出故也

昭公薨於外定公踰年追行即位之禮史亦追書也

晉惠不書即位與

魯諸侯異焉曷異爾曰春秋者因諸侯之史作焉故  
公卽位皆稟命於王有所不書則禮有所不至也元  
經因天子之史作焉帝卽位皆受命於天有所不書  
則天有所不與乎故仲淹亦不與其卽位也不與宗  
何曰惠帝君不君政出多門天下由茲大亂雖嗣位  
猶無位乎故不書卽位元經之微旨也

言元經因惠  
帝不君所以

作也不明  
貶故微旨

楊氏者何曰武帝元楊后之妹謂之悼楊

后無子元楊后生惠帝早亡惠帝卽位尊悼后為皇

太后書曰立太后楊氏禮也

先書立太后言天子必有后尊也後云楊氏言

推恩及親也

賈氏充女初武帝將娶衛嬪女而楊氏欲娶

賈氏女遂以為太子妃武帝憂太子不慧試以疑事

使決之賈氏令給事張泓具草使太子寫荅武帝悅

至是政由賈氏天下亂矣書曰賈氏為皇后猶言賈

氏自為之也

不言立非惠帝立之也

武皇帝四月崩五月葬譏

速也周制天子七月而葬同軌畢至言天下會葬有

不至則禮不備凡未及期而葬謂之不懷過期而不

莖謂之緩春秋皆譏之

元經禮典本春秋

太傅駿孰謂曰楊

駿也胡不書姓曰貶也曷貶爾曰駿為太傅受先帝

遺詔輔政百官總已不能效伊霍之忠稔成賈后之

惡晉室禍階實自駿始故去姓以罰其罪惡之深也

書太傅責官重也

元經貶惡其義權衡輕重各有所存是以有書名而去姓者有書姓

名而去官者前後別例各不同傳釋之詳矣

廣陵王適惠帝子也立為皇

子正也何劭為太子師王戎為太子輔楊濟為太子

保同書之謹其職也

裴楷和嶠張華衛瓘皆為保傅不書省文

石鑒為太



尉隴西王司馬恭為司空書三公得其人也鑒字林  
伯太康末拜司空武帝晏駕楊駿疑汝南王亮白太  
后詔鑒率固陵兵討之鑒獨不然遣人視亮別道歸  
許昌駿疑乃止時論稱鑒不以權臣誣害宗室正也  
司馬恭字子舒遷太尉錄尚書事雖為宰輔服膳如  
布衣任真簡率每朝會不識者不知是王公事親恭  
謹居喪哀戚為宗室儀表當時以節制見稱餘王莫  
能比同書者王公得賢也

元經凡書姓名及稱官者  
皆無貶元經始事也下文

書堯蓋終其善也有不書堯者則有譏焉

屯兵四出何曰楊駿輔政慮他

變乃遣石崇胡奕趙俊趙歡將屯兵四出以示威也

不書遣不由帝也戎兵國之大事書兵而不書人不

稱詔遣者政由臣下出也

兵出無名此義微而顯

經太熙二年春帝正月乙酉改元永平又改元康

自太熙改

永熙共一年耳太熙二年又改元康一年三改非禮也故經止書太熙二年而已

三月中書令

和嶠卒辛卯賈氏殺楊駿夷三族壬辰賈氏廢皇太后

士寅汝南王亮為太宰夏五月甲戌毘陵王軌薨

無傳按元

楊后生悼王執字正則惠帝同母弟也

壬午賜天下孝悌高年鰥寡力田

者帛六月賈后殺汝南王亮及太保衛瓘乙酉曲赦洛

陽秋七月置江州冬十二月辛酉京師地震秦王東薨

無傳按秦獻王東字弘度惠帝同母弟也傷駿舅氏誅滅乃述武帝遺旨乞歸藩至汝南王亮楚王瑋被誅時

稱東有先識

傳曰武帝崩未踰年而改元非禮也君子謂違春秋

未踰年不書卽位之義故書太熙二年正月失也和

嶠字長輿世為魏大臣襲爵上蔡伯以平吳功轉侍

中見太子不慧因侍坐曰皇太子恐不了陛下家事  
荀顗荀勗皆稱太子明識嶠曰聖質如初爾武帝不  
悅然知其言忠後惠帝立賈后使帝問嶠曰不了家  
事今定云何嶠曰臣事先帝曾有斯言言之不效國  
之福也至是卒世稱其先見書官以卒善其終也

官未

至三公  
不書薨

賈氏殺楊駿賈氏不稱皇后駿不稱官兩貶

之也曷謂兩貶曰駿以后黨權傾天下早不能圖賈  
后而賈后與黃門董猛連兵討駿駿逃於馬廐以戟

殺之楊氏夷三族不稱官與無官同也不稱后不與  
其為后也賈氏廢皇太后何曰悼后駿女也駿旣  
誅及矯詔廢悼后為庶人徙金墉城稱賈氏不與其  
為后元經之權也汝南王亮為太宰言自為也附賈  
后將取禍也為六月賈后復殺亮張本漢制賜孝悌力田等帛且  
曰孝悌吏民之師也力田生民之本也高年鰥寡者  
亦調恤之皆古道也書之存舊典也非賈后事也賈后殺  
汝南王亮及其太保衛瓘春秋之法大臣相殺死凡

稱名所以示殺者之罪若王子紂殺毛伯召伯是也  
苟死者無罪則書名氏若晉殺其大夫陽處父是也  
今稱賈氏罪殺者之惡也

衛瓘稱官  
傷忠臣也

曲赦非古也賈

氏使楚王瑋殺亮及瓘又歸罪於瑋而殺之故曲赦

洛中懼瑋黨有變焉

殺楚王瑋不書云瑋附賈七  
月后害骨肉大不足取也

分

楊州荊州十郡為江州記始置也

用本史舊文記  
其始置無褒貶

京

兆地震案本志謂楚王瑋殺汝南王及太保此陰道

盛陽道微之應也

劉向曰地震金木水火土沴也伯  
陽甫云天地之氣不過其序若過

序則氣亂也陽伏而不能出  
陰迫而不能升於是地有地震

經元康二年春帝正月

太熙二年即元康元年也故此為二年

二月己酉

賈庶人弑太后於金墉城夏四月秋八月壬子大赦逆  
黨冬十一月沛國雨雹傷麥

傳曰正月雖無事必書首月春秋之法也賈庶人孰  
謂曰賈后也曷謂先稱庶人曰賈后既誅楊駿宣言  
太后同逆廢於金墉城絕膳而崩經書曰庶人弑太  
后貶大惡也是時未廢為庶人先貶之者不與其稱

后也春秋之法凡弑君稱君名者君無道稱臣名者臣之罪也賈氏以婦弑姑以邪賊正也太后賈之姑也故書弑

傳言惠帝不慧致弑其母其惡同

大赦逆黨者何賈氏懼

國人討賊故赦以安逆黨之心春秋莊公經書肆大青然後葬文姜蓋文姜預弑桓之惡仲尼謂子道不可畧母葬故特書肆大青然後葬文姜子道掩親之惡也賈氏則不然自赦其黨託名渙汗君子不與其赦也故特書曰大赦逆黨

本史云壬子大赦仲淹特書逆黨

雨雹傷



麥紀災異也春秋公子遂專任而經書雨雹

按董仲舒曰紀

雹者皆謂有脅行專政者也

經元康三年春帝正月天西北裂夏四月雨雹深三尺  
冬十月太原王泓覽作互市皇太子納妃王氏祕書監  
華嶠卒

傳曰天裂者何本志謂陽不足也人主昏瞽妃后專  
政之應也滎陽弘農皆雨雹深三尺非常雹也異孰  
甚焉本志謂惠帝無陽為陰所蔽之罰也春秋魯桓

夫人同其應矣左傳曰大雨雹書災也曷謂互市曰

公卿賄賂交通更相薦託有如市易焉作者言惠帝

自作之爾

識惠帝暗

太子適納王夷甫女為妃凡帝子婚

曰納帝女嫁曰降

納者獻乎上也降者適乎下也

華嶠者武帝碩臣

也太康末帝宴樂屬疾嶠諫曰收功於微忽事乃無

悔慮福於垂成祚乃日新手詔答曰朕自消息無慮

也惠帝立遷祕書監博聞多識有良史之稱卒謚曰

簡

嶠字叔駿以後漢紀繁乃徧觀祕籍起光武終獻帝一百九十五年為紀十二卷皇后紀二卷十典

十卷列傳七十卷嶠謂皇后配天作合前史作外戚傳非也故易為皇后紀又改十志為典取典墳之義明堂辟雍置都水脩蜚官行於世書官貴之也

經元康四年春帝正月丁酉太尉石鑒薨夏五月匈奴

攻上黨六月壽春地震民死秋八月匈奴以計內附上

谷上庸並地陷帝問蛙鳴

無傳按本史華林園蛙鳴帝問曰為官乎為私乎其愚類

如此九月甲午枉矢竟天冬十月

傳曰太尉石鑒薨書官善其終也

按本史鑒年八十薨謚曰元子薨封

縣侯

匈奴者何曰郝散

散曰

自漢魏已來世為中國患

魏武帝能制御群胡為五部左部居太原茲氏右部

居祁南南部居蒲于北部居新興中部居太陵至晉

武帝時塞外匈奴二萬餘歸附使居河西宣陽太始

七年單于猛叛

太始晉武初  
受命年號

帝討平之厥後稍叛復

害長史時御史大夫郭欽上疏曰請募敢死及罪人

徙三河控四夷出入之防明先王荒服之制帝不納

太康中匈奴十九種內附各分部落居之有屠各種

者得為單于有王號者十六等曰左右賢王太子為

之餘四姓曰呼延氏卜氏蘭氏喬氏呼延號曰逐世  
為輔相其國民則有纂母氏勒氏者多反叛至是凶  
奴郝散叛寇上黨殺長史又寇上郡郝散弟曰度元  
又率羗胡攻破上郡自此凶奴漸盛而中原危矣經  
書凶奴不名者言其多雜也稱攻不書寇者言鳴鐘  
鼓而來無所憚也傳言不用郭欽計壽春地震民有死者言  
災甚也按本史是歲京師及郡國皆地震秋八月凶奴郝散帥衆降  
馮翊都尉殺之書曰以計內附者何曰凶奴本不附

蓋偽降欲為鈔掠既為都尉所殺而郝散之弟度

音鐸

元收合餘衆復起邊患

傳謂六年改元攻馮翊起度元歐陽逢張本

書曰

以計言多詐不可以信結也可以兵制而已

軍制凡無故而

請和者詐也

地陷者山崩震裂而陷蓋陽伏而不能出陰

迫而不能升也春秋僖十四年沙鹿崩卜偃以謂暮

年將有大咎幾亡國今上谷上庸並陷裂水泉湧出

人有死者天戒若曰陰不陰斯譴罰之漸乎

陰不陰則地有

災異枉矢曷謂曰星如流矢也星經云枉矢所觸天下

所伐也甲午枉矢竟天自西南流東北坤不利東北

其賈后之亂乎

地為后之象

經元康五年春帝正月

書首月

夏四月有彗孛於奎軒轅

秋九月鴈門大風傷稼冬十月武庫火十二月調兵器司

隸傳咸卒有石生京師

無傳

傳曰彗者如帚彗也孛如芒散貌也本志謂奎為庫

兵軒轅為后宮賈后將廢之兆

凡經書星變者紀異以戒人修德也其間

或有應驗亦有不應者天道遠也

大風由鴈門風自北來也胡戎來

窺中國失道猶夏之象也洪範云霧常風若

露蒙也武

庫火累代之寶皆焚

謂孔子履漢祖劍之類時藏在武庫皆焚之

春秋凡

天火曰災人火曰火武庫火者有盜焚之爾不獲盜

焉調兵器者丙戌新作武庫大調兵器曷謂不書新

作武庫曰譏失政也何謂失政夫武備中國大政也

周禮大司馬掌邦之政以詰禁刑亂故也盜焚之不能討賊雖新作無所

益也故書兵器而已不書作武庫言中國武備弛矣

終有群胡亂華之禍傳咸者司隸玄之子也剛簡峻整有父風



出為冀州刺史繼母杜氏不肯隨咸自表解冀州乃

遷司徒左長史

便其親也

楊駿輔政咸言於駿曰天下聽

於冢宰大懼天光有蔽人心或異今若此而明公處

之未為易也時司隸荀愷有兄喪自表赴哀詔未報

而愷私造楊駿而行咸奏曰詔未下而行宜加顯貶

駿甚憚之遷御史中丞致書汝南王亮曰楊駿見誅

孟觀李肇封數千戶侯自古封賞無若此者今後莫

不樂國有禍其可極乎不納

亮果如誅見

後為司隸奏僕

射王戎備位公輔兼掌選舉不能凝庶績但開張奔競不能康正請免戎官吳郡顧榮聞之曰傳長虞為司隸勁直忠果所可貴也書司隸卒重世卿也

春秋貴重

世卿亦如此

經元康六年春下邳王晃薨三月彭城有流血三百餘步夏四月大風五月匈奴攻北地殺太守秋七月氐賊僭稱帝冬十一月命周處討氐賊關中饑大疫

傳曰下邳王晃宣帝弟孚之子也孝友貞廉有宗室之

望惠帝卽位晃領護軍屯東掖又誅楊駿有功作司空  
薨于位旣而張華代之不書張華華備位而已不繼賢

王故不書代

為八年台星折以明三公不才張本

彭城呂縣流血三百

餘步本志謂視之不明火不炎上則有赤青赤祥又  
彭城下邳獻王所治之國也入為司空旣而遽殞彭  
城失望之象也

流血傷痛也

四月大風言天下皆然也故

不書地

不書郡國所在

先志謂巽為風為木其卦在三月四

月繼陽而治今四月大風常多且暴陽失其治也

劉向

亦云然 匈奴殺太守者何曰郝散之弟度元攻北地太

守張塤戰死之匈奴不名衆也太守不名氏微也曷  
謂微則不書曰郡守失其才為匈奴所殺故微之氏  
賊者孰謂曰秦雍氏羌齊萬年也先是雍州刺史解  
意為匈奴度元所破於是氏羌帥齊萬年叛僭稱帝  
圍涇陽萬年不書名言賊不足名也曷謂不書圍涇  
陽曰罪莫大乎僭號也貶大惡餘惡無所書可也周  
處者為建威將軍詔討齊萬年稟梁王彤節制書人

不書官者何曰元經之法人名重官任輕則書名以  
明人賢任卑也書官不書人者不賢也有書人則因  
舊史常制無所輕重矣元經權衡義例差別臨文示  
意在乎官不必備惟得賢而已或人稱職官稱任則  
官與人皆書之或官濫於庸人賢失於所任則書人  
不書官不書人不書官意有重有輕以譏失道焉耳  
周處賢將也受制於梁王彤進止不得專智勇不得  
用故君子重其人不書官言官輕也

謂周處終為梁  
王彤所制張本

關中饑疫責凶荒不卹也梁王彤為征西大將軍都督雍梁二州鎮關中民饑不能貸民疫不能卹彤之罪也故書關中饑疫以責都督之罪由彤也

梁王彤永康二

年薨博士議謚曰彤為宰輔責深任重墜懷之廢不聞一言諫正淮南之難不能因勢輔議趙王倫篡逆不能引身去朝皆宋有蕩氏之亂華元自謂不能居官吾罪大矣若彤不貶何以施法按謚法不勤成名曰靈春秋譏華元樂舉謂之不臣乃謚曰靈彤罪如此

經元康七年春帝正月癸丑梁王彤陷王師殺周處夏五月魯國雨雹

無傳

秋七月雍梁陷霜殺稼丁丑司徒王

渾瑊冬十月

傳曰陷王師殺周處何謂曰去年遣周處討齊萬年  
至是戰於六陌梁王彤與處有隙促令進軍絕其後  
不救遂為賊所敗初萬年間處來謂賊眾曰吾聞斯  
人才兼文武若專斷而來不可當也受制於人則成  
擒爾既而賊屯梁山有眾七萬彤促處領兵五千擊  
之於六陌自旦至暮斬賊萬計救兵不至處按劍曰  
吾盡忠竭節之秋也遂力戰歿書曰陷王師以彤不

忠於國也又書殺周處以彤私隙害賢人故書彤陷

殺之爾

傳言晉袁山賊賢為始

隕霜殺秋稼關中米斛萬錢骨

肉相賣災甚也春秋書隕霜不殺草尚謂天反時為

災而况秋霜殺稼災可知矣王渾孰謂曰渾字玄冲

魏司空昶之子平吳有大功江東士人悅附之楚王

瑋將害汝南王亮先請渾同秉渾閉閣拒之後瑋伏

誅渾乃出凡國政典故多渾所定書官以薨貴之也

渾先

知晉室亂乃謂賢王宜留居京師遂上書帝不納又  
上言舊制三朝元會問計吏以防郡國政化時以為



便  
王戎代渾為司徒不書貶戎不足以繼渾之賢也  
故不書

經元康八年春帝正月丙辰地震詔發倉廩賑關中三  
月壬戌大赦夏五月郊禱石破為二秋九月劉卞廢賈  
后不克冬十月

傳曰地震書日者日官謹天戒也春秋文公九年九  
月癸酉地震公羊傳曰震者地動也言文公制於公  
子遂齊晉失道四方叛德也穀梁傳曰地不震者也

地以不震動為坤靜之德震則謹而日之象大臣強盛動而為變

焉

謂賈后強盛將廢太子通之象也坤臣道也妻道也

詔賑關中書詔者得其

詔也

傳言民饑不賑則詔不詔矣

壬戌大赦者曰梁王彤專政殺

周處氏羗未平故肆赦因以自宥

為明年彤錄尚書事入輔賈后張本

郊禱者何曰求世嗣之神也在郊故曰郊禱

或曰本高禱

志謂禱之壇石中裂破為二木沴金之象也壇石神

位自毀者愍懷太子不利之兆

謂明年賈后廢太子適之兆

劉卞

者孰謂曰愍懷太子衛率也卞潛知賈后欲廢太子乃

告司空張華曰東宮俊彥如林四率精兵萬數公居  
阿衡廢賈后以安晉祚可乎華不能故書曰劉卞廢  
賈后褒忠於晉祚也不克者貶華不能行也春秋以  
一字褒貶須數字以成文元經大義於是深矣

經元康九年春帝正月將軍孟觀伐氐大破之獲賊萬  
年梁王彤錄尚書事河間王顥出鎮關中成都王穎出  
鎮鄴夏四月鄴賊張承基伏誅六月戊戌高密王泰薨  
秋八月尚書裴頠為僕射冬十一月甲子朔日有食之

十二月壬戌賈庶人殺太子及其母謝太后

傳曰孟觀者為積弩將軍時齊萬年衆號數十萬觀  
領宿衛兵并統軍中士卒大戰十數皆破之生擒萬  
年獻捷京師書將軍言官得人也萬年不書姓志在  
族滅逆黨也梁王彤錄尚書阿賈后也阿順賈后  
謀廢太子河  
間王顥者安平王孚之孫先朝之制非親王不得都  
督關中顥於諸王最踈然特以賢舉也書出者內出  
外為文賈后忌顥賢示以重鎮其實出之耳成都王

潁武帝第十六子於帝最親先是賈謐賈充孫也與皇太

子博奕爭道潁旁觀厲聲曰國之諸君賈謐安得無

禮謐懼言於賈后乃以潁出鎮鄴書出者懼之也二王

同書出其情各異一以賢一以懼皆書出蓋君子不欲其出

也鄴賊張承基等妖言署置逆黨數十人郡縣分捕

之書伏誅喜平賊也高密王泰而隴西王也改封高

密宣帝弟馯之子也謐曰文獻尚書裴頠字逸民司

空秀之子書曰僕射以人稱官也冬十一月甲子朔

日蝕本志謂十一月日蝕十二月廢太子為庶人之  
應也自武帝太始二年七月丙午至七年十月丁丑  
八年十月辛未九年四月戊辰七月丁酉十年正月  
乙未三月癸亥凡八年八日蝕又咸寧太熙凡十一  
年復八日蝕至此甲子及明年正月乙卯皆蝕天意  
若曰晉室衰亂由武帝始違忠臣之言惑賈后之勢  
遂及淪胥天譴既頻終不警悟經書甲子日蝕舉其首  
以戒其終也賈庶人殺太子者何曰賤庶人以彰殺

太子之罪也本史稱元康九年廢太子幽于金墉城  
明年改元永康害太子于許昌今先一年因廢而書  
殺者言賈后志在乎殺也謝淑妃惠帝才人生慙懷  
太子適先為賈后幽于金墉尋殺之故書曰及其母  
謝太后然妃書謝太后何曰儲君既立春秋之義母  
以子貴謝妃無罪見殺元經因推而進之也故書曰  
太后也賈氏承惠帝昏愚賊害皇嗣元經固抑而降  
之也各正以法且矯晉之失焉

按春秋隱三年君氏  
卒左傳曰聲子也不

赴于諸侯不附于姑故不稱薨不稱夫人故不書姓而曰君氏言國君之母雖不薨不姓而特書曰君氏言君之母氏尊稱也亦仲尼追書云耳今謝妃之卒仲淹先書庶人之惡後正太母之無過春秋大義於是明矣

經永康元年春帝正月己卯日有蝕之夏四月晉誅賈庶人及其黨甲午趙王倫自為相國五月己巳立皇孫暉為皇太孫六月葬愍懷太子秋七月冬十月黃霧四塞甲子立羊氏為皇后

傳曰趙王倫廢賈后為庶人尋殺之曷謂稱晉殺為文



曰倫雖矯制而晉有天下當稱晉殺之明天下共誅

惡也

按春秋僖七年鄭殺其大夫申侯公羊傳云稱國以殺也杜預曰專利而不厭故稱名以罪殺

之也凡罪稱國以殺而又名之若楚殺其大夫宜申宋殺其世子座莒殺其公子意恢之類是也今誅賈氏不名而稱庶人示深貶之也

其黨數十人孰謂曰司空張華僕射

裴頠皆大臣不能扶危濟亂反死於不義故蔑而不

書猶微人耳曷同微人曰倫誅賈氏使張林收華及

頠將刑謂張林曰欲害忠臣邪林詰之曰卿為宰相

任天下事太子之廢不能死節何也華曰非不諫也

林曰諫君不從何不去位華不能答遂與顧皆夷三族以小辯虧大節屈於張林故曰同微人耳春秋元經皆不齒也趙王倫者宣帝第九子傷太子無罪見廢乃與嬖人孫秀同殿中郎士猗等矯詔敕三部司馬入華林迎帝遂廢賈后乃矯詔自為相國書曰自為者貶也惠君不君倫臣不臣故先貶之

謂明年倫篡帝位張

本太孫臧愍懷之子也母王氏稱太妃趙王倫自為

太孫傳雖倫立之不貶者臧當立也

其實趙王倫假太孫之名而立

之非詔立也時書立而  
名之猶言惠帝詔立 堊愍懷太子太子名遹初賈

后令太醫程璩合巴豆丸使黃門孫慮與太子服之

而死賈后表請以王禮葬之經書太子不書王先稱

其謚追而正之也

葬顯平陵  
謚曰愍懷

黃霧四塞本志謂金木

水火沴土沴時則有黃青黃祥洪範視聽言貌皆以

思為主心不思則其咎為昏霧四塞焉羊氏者何玄

之女也既誅賈后故以立羊氏焉

按本史羊氏名獻  
容晉亡後沒於劉

曜生二子而卒  
偽謚文獻皇后

經永康元年春帝正月乙丑倫篡帝位以帝為太上皇  
太孫為濮陽王癸酉倫弑皇太孫三月齊王罔舉兵討  
倫夏四月東興反正改元永寧立尚為皇太孫六月戊  
辰大赦秋八月校尉羅尚討西羌破之己巳下邳王韓  
覲無傳冬十月沅人李特盜據蜀十二月司空何劭覲

傳曰倫篡帝位故去族也殺太孫臧稱弑者倫罪與

弑君同也

天下儲君殺之與弑同

三月齊王罔倡義兵成都王

穎河間王顥常山王乂豫州刺史李毅兗州刺史王

彥新野公歆皆應之逐倫歸第誅之書曰討倫詔殺

君之

闕

與反正者初倫遷帝於金墉城永昌

闕

至是

闕

羣臣乃迎輿復歸正殿故曰反正也

云立尚者何愍懷第三子也長曰彪

補聞切

永寧元年

薨追封南陽王次曰臧卽太孫也為倫所害謚曰哀

次卽尚也初封襄陽王帝旣反正乃立尚為皇太孫

正也六月戊辰大赦詔云逆臣孫秀奉趙王倫贊據

天位鎮東大將軍齊王冏征北大將軍成都王穎征

西大將軍河間王顥首建大策匡濟國難迎朕幽宮  
旋軫閭闔豈余一人獨享其慶宗廟社稷實有賴焉  
於是大赦慶苟安也羅尚者誰曰羅憲兄之子也太  
康末於西戎校尉羗者戎之種有不順則校尉當討  
焉破之嘉其功也流人李特自齊萬年之亂關中饑  
民流移漢中特在內依益州刺史趙廞因襲廞遂據  
成都時群盜皆起有君焉不書反而書盜言盜多也  
按載記五涼四燕三秦二趙夏蜀凡  
十六國皆東晉亂各盜一方故云多何劭者曾之子

也少與武帝同年有總角之好惠帝以劬為太子師  
遷至僕射趙王倫專政以劬為太宰厥後三王交爭  
劬知晉室不可救游於三王之間無怨者晦迹自足  
不貪權勢有奏議文章多行於世書官薨無所譏也  
三王爭權各總兵柄劬雖為  
太宰虛名耳故不罪之也

經太安元年春帝正月庚子譙王隨薨三月癸卯皇太  
孫尚疾薨夏四月彗星晝見五月梁王彤薨劉寔為太  
傅立清河王覃為太子秋七月冬十二月河間王顥及

諸王殺齊王罔改元太安長沙王乂為太尉

傳曰譙王隨者宣帝弟之孫也父遜封於譙謚曰剛

王襲封譙書薨常制也太孫尚薨曷謂書疾

王薨他不書疾

曰尚幼夭而亡故書疾以明非殺害也晉室陵夷宗

室屠戮自愍懷之禍及其子臧皆非天年獨尚雖非

殺害夭以疾薨實傷之也彗星晝見占云主兵劉向

五紀曰春秋有彗字於東北傳言記異也甘氏謂彗

字所當國受其殃蓋諸王相禍之應也梁王彤為侍



郎中太宰領司徒書王爵不書官何也曰貶也曷謂  
貶曰倫之篡位以彤為阿衡不能討賊迎復其君故  
君子不與其為太宰也書王爵猶言沒於藩邸耳

非大逆死卽例  
書王爵非褒也

劉寔者何曰字子真以孝廉計吏累

遷至太傅寔終身儉素晉之名臣也書太傅以人稱  
官也太子單者武帝子清河王遼之子遼生四子單  
為長齊王冏表曰東宮曠然冢嗣無繼必建諸副以  
固洪基昔漢成無繼嗣由定陶孝和之緒安以紹興

此先王令典也清河王暉先帝衆孫之中今為嫡長  
宜奉宗廟之重以寧四海羣公卿士咸同大願乃立  
為皇太子書正也諸王殺齊王問何謂曰問獻王攸  
之子討趙王倫有大功率兵入洛頓軍豫章置甲士  
數十萬置掾屬四十人大築第館廷舞八佾惟寵親  
昵海內失望寮屬孫惠者諫曰天下有五難四不可  
明公皆已居之矣捐宗廟之主忽千乘之重而躬擐  
甲冑一難也奮三百之卒決全勝之策二難也捨殿

堂之尊同將士之勞三難也任神武之畧無疑慮之  
懼四難也外幽居復皇祚五難也然而大名不可久  
荷大功不可久任大權不可久執大威不可久居此  
四不可也自永熙以來十有一載公族值篡奪之禍  
骨肉罹梟夷之刑群公被囚檻之困妃主有離絕之  
哀今明公建不世之大功宜倣桓文之烈追臧札之  
風高拱營丘之藩則善矣罔不納有軍校李舍之者  
奔於河間王顓游說圖罔顓乃上表曰春秋之義君

親無將也。罔擁強兵，恐為不軌。檄諸王共討，罔殺之。  
幽其子三王於金墉城。罔三子皆封王，太盛故諸侯共攻之。書顓名而不書諸王名者，譏王族自相滅舉顓為首也。諸王不名，王衆多也。猶春秋稱人者，衆之義。

經太安二年春，帝正月三日，刺史宋岱斬蜀賊李特。夏四月，李雄復盜益州。五月，義陽蠻僭號殺新野王歆。六月，詔刺史劉弘討蠻張昌。王師敗績，陷江南諸郡。秋八月，校尉劉弘斬張昌賊平顓。顓戕長沙王乂。乙丑，帝出。

三里橋冬十月

傳曰宋岱為荊州刺史討李特斬之傳首京師夏四月特子雄又據益州故書曰復盜也義陽蠻張昌少為平氏縣吏當李特寇蜀也昌潛遁聚黨數千人會壬午詔發江左武勇赴益士停留五日二千石免官於是郡縣驅逐因屯聚為盜昌先於安陸起攻郡守新野王歆討昌為其所敗故書曰殺新野王歆不書王師言歆便宜擊賊不意賊盛而死也歆宣帝之孫

為政嚴刻蠻夷並怨及昌作亂歆為賊所害于樊城  
是時賊殺南陽太守劉彬武陵太守賈隆零陵太守  
孔紘豫章太守閻濟武昌太守劉根皆不書者舉歆  
帝族為首也南蠻校尉詔討昌戰于方城書王師敗  
績挫國威也陷江南諸郡謂武陵零陵豫章武昌等  
郡也八月斬張昌於清水書賊平言諸蠻皆平也劉  
弘遣其司馬陶侃與昌苦戰累日昌竄於下雋山至  
是擒之傳首京師諸蠻皆平嘉告功也凡諸侯有四

夷之功則獻捷於王王親受之晉衰不復古禮但傳  
首京師亦足嘉焉顓頊不貶去族也顓太原王瓌之  
子顓武帝第十六子舉兵討長沙王又為名其實謀  
篡逆也初顓之討罔也檄以又為內主謂又弱欲得  
內助又圖廢惠帝立成都王顓也既而又輒勝罔顓  
乃潜使刺客圖又不果詔又拒之自八月至十月又  
致書與顓曰吾與卿友于十人同產皇室受封外都  
今卿與太尉顓共起大眾百萬軍圍宮城羣臣同憤

卽命將死者萬計酷痛無罪卿所遣陸機已送款國  
家想來者之前行一尺卻行一丈不願來矣卿宜還  
鎮以寧四海宗廟無羞子孫之福也穎答書曰若能  
從太尉之命斬皇甫嵩等首投戈退讓自求多福深思  
進退也右將軍皇甫嵩掌禁兵東海王越貳於乂潛與殿中將  
收乂送金墉城乂上表曰陛下委臣朝政小心忠孝  
神明所鑒諸王承詔率衆見責收臣幽宮臣不惜軀  
命但念大晉衰微耳殿中左右以乂功垂成而敗謀



出之帝不省閱使張方裂殺之三軍無不垂涕經書  
戕者言殘賊忠臣也春秋之義凡自內虐其君曰弑  
自外而殺曰戕今顓頊罪亞於弑君戕殺忠良故去  
族而名之書戕以貶大惡也乙丑帝出三里橋避顓  
兵所逼也顓使張方逼京師帝使皇甫商拒戰王師  
敗績甲申帝軍于芒山丁亥至偃師辛卯舍于豆田  
癸巳旋於城東丙申進軍緱氏十月帝還宮經書曰  
出言奔避無所幸也天子無出之文惠帝自三里橋

卷一  
為賊兵屢逼芒山偃師緱氏暨還宮崎嶇在外猶如  
春秋國君出奔之難故書出蓋傷之甚

經永興元年帝正月丙午尚書令樂廣薨詔雍州劉沱  
及秦州皇甫重討顓攻長安不克穎自為丞相二月顓  
矯詔廢皇后羊氏降太子覃為清河王三月廣陵陳敏  
討賊石水斬之揚徐二州平顓立穎為皇太弟六月新  
作三城門秋七月丙申衛將軍陳旌以詔討穎戊戌復  
皇后及皇太子已亥帝北征穎敗績於蕩陰帝幸鄴八

月匈奴劉淵盜起離石王浚攻頽於鄴帝還洛陽十月  
顥將張方劫帝幸長安十二月丁亥廢皇太弟頽立豫  
章王熾為太弟

傳曰樂廣孰謂曰成都王穎之妻父也長沙王乂以

此問廣廣對曰豈以三兒易一女哉

廣三子曰凱肇  
謨一女適成都

穎乂猶疑之廣竟以此憂卒代王戎為尚書令書薨

閔廣賢以憂死也帝為顥所逼密詔劉沈皇甫重討

顥攻長安為顥所敗書不克譏沈重不武也穎以兵

五萬屯十二門殿中素所忌者皆殺之以三部兵代宿衛自為丞相此將為篡逆先自進位也顯矯詔廢皇后卽羊玄之女也元康元年立為后至是顯矯詔廢廢欲速賜死司隸校尉劉暉上表諫得免太子覃太安元年立至是顯矯詔黜為王經書降不書黜覃無過不與其黜也

本史書黜也

陳敏為廣陵度支石冰者賊

張昌之別將也昌既敗冰入揚徐為寇敏與壽春都督劉準同力擊破之乘勝北討徐州賊封雲皆斬之

書曰揚徐二州平嘉敏功也

按本史陳敏因此功遷廣陵相後盜江東華譚

以書與甘卓殺敏江東遂平

顯立穎為皇太弟者何顯專政惠帝

不能制故書曰顯立之也新作三城門非帝意也顯

穎陰圖神器擅此興作豈止不時而已

傳言春秋新作南門新延

廐皆書不時元經所書謂非帝意所譏皆同也

右衛將軍陳豨稱詔百寮討

成都王穎因大赦復皇后及皇太子已亥奉帝北征

至安陽穎遣其將石超拒戰矢及乘輿帝頗中三矢

時王戎東海王越高密王簡平昌公模吳王晏豫章

王熾襄陽王範及蕩陰六王之軍皆潰故曰六軍敗績也帝為石超所脅往鄴見穎穎迎于道左帝下輿涕泣穎改元為建武不書不與其改元也匈奴劉淵字元海反于離石自號大單于經書盜言僭竊之漸也僭稱前趙也安北將軍王浚尚書沉之子也趙王倫篡位三公起義浚時都督幽州有不平之色乃率鮮卑務勿塵合胡晉兵萬人討穎與石超戰于平戟超敗克鄴帝奔還洛陽浚不書官貶也曰浚本心不軌託

名討頽其實為華亂之首雖有一時之功不能追終身之惡功小惡大故也張方者河間王顥之將也以三千陽燧青蓋車逼帝之長安帝馳避後園竹中方曾帝升車顥步騎三萬迎於灊上顥去族而張去姓何也曰顥首惡也張方微也貶大惡則餘系焉丁亥詔曰成都王頽政績虧損四海失望宜還第今以豫章王熾為皇太弟此詔由顥出也故不書詔

經永興二年春正月甲午朔帝在長安夏六月甲子王

戎卒秋七月甲午尚書諸曹火冬十二月范陽王魴及東海王越舉兵迎帝

傳曰甲午書朔者何春秋之法魯秉周禮晦朔朝正告廟蓋國君所以頒王之典禮尊祖之廟貌以示常制也故魯公在楚必書於經左傳曰王正月公在楚釋不朝正於廟也昭公三十年三十一年皆書公在乾侯傳曰言不能内外也仲尼之意本欲書公所在雖奔外亦吾君也不可易歲更朔而不書君行幸之



地惠帝為顯所脅雖歷數在躬朔之禮廢矣故曰帝  
在長安猶書朔也王戎

闕

少與阮籍輩為竹林之遊惠帝以戎

闕

浮沉無蹇諤之節尋拜司徒性好利

闕

天下目之為膏肓之疾帝西遷也

闕

官而卒者貶也尚書諸曹火延及

闕

陽王虓者何康王綏之子東海

王越

闕

惠帝西遷虓與東平王楙上

言曰自

闕

建成都王穎為姦邪所誤

論王之身不可深責於是魓先率衆謀自許昌屯於  
滎陽推東海王越為盟主乘虛而進穎據洛遣張方

劉弘並不能禦魓拔滎陽斬石超襲許昌破劉喬

超喬

皆穎將也

穎於是出奔書曰迎帝嘉之也

謂明年帝還洛張本

經光熙元年春帝正月戊子朔帝在長安日有蝕之甲  
子東海王越迎帝三月劉栢根反平之夏五月范陽地  
燃壬辰越遣將擊顯穎於長安日光四散如血六月丙

辰朔至自長安改元光熙盜取太廟靈衣八月越錄尚書事九月劉輿誅司馬頴十一月庚子帝崩

傳曰戊子朔先書帝在長安後書日蝕者先典禮而

後災異也

舊典帝所行在必書

東海王越遣劉宏奉帝乘牛車

行宮籍草公卿跋涉書曰迎帝帝未至之文也劉柏

根者何東萊人也反襲臨淄高密王簡奔聊城王浚

遣將討栢平之五月范陽郡地燃可以爨本志謂火

失其性視不明之罰也壬辰祁弘所部鮮卑大掠長

安殺二萬餘人日光如血蓋天人之否極此矣丙辰  
書帝至自長安必告廟禮也春秋桓二年書公至自  
唐傳例謂公行告於宗廟反行飲至舍爵策勲焉惠  
帝自長安歸升舊殿哀感流涕謁太廟雖亂離不成  
飲至舍爵之禮然君子喜其至思欲成其禮焉太廟  
吏賈苞盜太廟靈衣書盜不書名微也天下皆巨盜  
竊弄故廟吏微不足名越錄尚書事不書王去族何  
也曰前者王迎帝於長安以書王嘉之也此不書王

去族者貶越將復篡逆也聖人之於善惡不求備於

一人雖惡者有善必褒雖善者有惡必貶故前書王

後去族臨事加法春秋之大權也

如春秋翬帥師以翬專命去公子之

族以貶之也至桓二年復書公子翬如齊逆女蓋其事別也不以其弑君而終身貶之耳春秋輕重臨事制權皆倣此也劉輿者范陽王魴之長史也先是頓丘太守

馮嵩執輿送於鄴幽之劉輿恐為後患偽稱詔賜死

書曰誅言輿有罪宜乎誅也不稱詔而書劉輿貶輿

專殺非君命也曷謂不書王而稱姓者曰輿自立為皇

太弟有無君之心蕩陰之役劫帝之鄴至是既為范陽所幽為輿所殺猶衆人爾非帝族也故曰司馬頴

按古氏族後世頗異馬左傳衆仲曰天子建德因生以賜姓昨之士而命之氏諸侯以字為氏因以為族官有世功則有官族邑亦如之杜預曰天子則有官族姓若禹賜姓如其氏曰夏是也諸侯卑不得賜姓則以字為氏因以為族或因邑皆稟於時君所命也漢魏而來則不然或邑或世稱皆謂之姓通謂之氏若范氏之祖在虞為陶唐氏在夏為御龍氏在商為豕韋氏周為杜氏晉為范氏是也今司馬氏即姓也宗室襲封之王即曰王族也去姓者舊史常文則無褒貶若去王族即筆削有善惡也頴書姓猶百姓

庚午帝崩于顯陽殿不書葬不得其終也曷謂不得

其終曰惠帝自卽位政由后黨權臣當國天下荒百姓饑死帝曰何不食肉糜其蒙蔽率皆此類及崩因食餅中毒或曰司馬越之鳩斯不得其終故不書塋按春秋書塋斯貴之也不書塋則賤之也天子之塋於禮尤重故魯會天子之塋則仲尼必書不會塋則不書若莊二年書塋威王則是會塋也僖八年惠王崩不書塋是魯不會塋也然則會不會塋者禮壞可知矣今惠帝崩不得其終非唯禮不備抑亦昏蒙不君自可貶矣

元經卷一



欽定四庫全書

元經卷二

隋 王通 撰

唐 薛收 傳

宋 阮逸 注

經晉懷帝永嘉元年春帝正月帝卽位改元永嘉立王氏為皇太后梁氏為皇后南陽王模誅司馬顒隰羨為司徒王衍為司空無傳詔除三族刑二月東萊王彌賊起三月將軍周馥討陳敏平之庚午立豫章王詮為皇太

子劉淵陷并州五月汲桑陷鄴城殺新蔡王騰洛陽地陷有二騫出秋七月琅邪王睿鎮建鄴冬十一月戊申朔日有食之十二月汲桑賊平越嶠詔囚清河王覃殺之

傳曰懷帝諱熾字豐度武帝第二十五子也惠帝崩

帝以太弟入踐祚於光熙元年十二月卽位明年改

元永嘉始書卽位謹始也

元經取元年正月書卽位皆端本正始之義王

氏懷帝母也諱媛姬早卒追尊為皇太后梁氏本王

妃也至是立為皇后正也南陽王模誅顓者何曰顓自立逼惠帝遷長安將謀篡奪擅廢太子單與成都王穎相表裏及為東軍所敗走南山復守長安南陽王模遣其將梁臣車上扼殺之書曰誅正其罪也削王書姓絕其親也除三族刑古之道也唐虞典刑罰不及嗣末世慘酷遂有夷族之說今除此刑雖衰世未能治平亦帝者之心書為後法可也

帝因諸葛攻周穆下此詔

東萊人王彌者魏玄菟太守頎之孫也因劉栢根賊

起于青徐卒亂天下書曰賊起言晉禍自此盛也陳  
敏廬江人自廣陵度支破石冰有功為廣陵相惠帝  
西遷敏據江東及周馥討之會稽郡悉平故曰平之  
太子詮新都王遐之子覃之弟也初襲封豫章王至是  
立為皇嗣正也

詮後奔苟晞  
沒于石勒

劉淵入并州劉琨獨保

晉陽諸郡皆陷于淵書并州陷則諸郡可知汲桑者  
馬牧帥也寇魏郡陷鄴城遂殺新蔡王騰騰者高密  
王泰子也迎惠帝歸洛陽以功封新蔡汲桑賊攻鄴

騰不能守而輕騎出走為賊所害罪不能守也洛陽  
步廣地陷有二鷺出蒼者冲天白者不能飛說者謂  
二鷺晉封為二之象也蒼冲天應琅邪王興晉也白  
者不能飛應西晉卒不振矣七月琅邪王睿鎮建鄴  
特書于經明晉祚猶長也諸王出鎮無足稱者多不  
書故也九月戊申苟晞破汲桑至十二月并州人斬  
桑于樂陵書平者喜賊平也東海王越將謀篡逆今  
年囚清河王覃於金墉城明年害之不書王貶矯詔

也

經永嘉二年春帝正月丙午朔日有食之

無傳

二月石勒

寇常山五月王彌犯洛陽司徒王衍禦之冬十月劉淵

僭號漢十一月尚書令高光薨

傳曰石勒上黨羯人也初居武鄉山草木有鐵騎象

永安初并州刺史司馬騰虜群胡賣於冀州兩胡連

一加勒在其中與汲桑同起歸劉淵後亦僭號稱趙

寇常山書始為亂也王彌自寇來山入許昌開府庫

取器仗有衆數萬進逼洛陽京師大震城門晝閉詔  
司徒帥百官距守彌屯軍七里澗王師進擊大破之  
彌奔劉淵書曰禦之不能擒賊也劉淵字元海永興  
元年反於離石至是僭稱漢下令曰昔我高祖神武  
應期文帝以文德升明武帝拓土攘夷宣帝搜揚俊  
乂今天誘其衷悔禍皇漢使司馬氏迭相殘滅孤為  
群公所推紹脩祖業不失舊物追尊劉禪為孝懷皇  
帝書淵僭號載記偽主淵為首也

按惠帝永興元年  
劉淵起稱漢後九

年石勒稱趙後十一年張重華稱涼後一年冉閔稱  
魏後一年慕容雋稱燕後三十一年慕容垂稱後燕  
後二年慕容冲稱燕是歲乞伏國仁稱秦呂光稱涼  
後十二年慕容德稱南燕秃髮烏孤稱南涼後二年  
李元盛稱西涼後二年沮渠蒙遜又自稱涼後四年  
譙宋稱成都王後三年赫連勃勃稱大夏後二年馮  
跋稱北燕其戰國者一百三十  
六歲凡十六國而元海為階首

高光者孰謂魏太尉

柔之子惠帝西遷朝臣奔散惟光侍帝及帝還洛以  
光為少傅轉尚書令以疾薨卒書官而薨嘉忠臣也

經永嘉三年春帝正月甲午彭城王釋薨三月戊申高  
密王略薨丁巳越入京師於帝側收中書令繆播害之



四月丁卯太尉劉寔退老積弩將軍叛奔於劉淵七月  
戊辰當陽地裂三所九月南陽王模破芒蕩斗叟並平  
之

傳曰彭城王釋穆王權之孫也襲封彭城高密王略  
文獻王泰之子小心下士有父風愍懷初立選子弟  
有名稱者為賓友略侍太子左右累遷開府襲封高  
密書薨禮也東海王越害繆播何也播字宣則光祿  
悅之子初越遣播詣長安說河間王顥令奉帝還洛

顯將張方言於顯不可播復說顯斬方以謝東諸侯  
及帝卽位以播為中書令掌詔命越惡播盡忠於國  
慮為已患因入朝以兵執播於帝側帝謂曰亂臣賊  
子無世無之不自我先不自我後哀哉起執播手歔  
歔不能禁越害之朝野憤惋皆曰善人國之紀也而  
越殺之其能終乎越不書王貶專殺忠臣也按本史  
越勒兵  
入宮於帝側收近臣繆播王延等  
十人並害餘不書于經省文也劉寔漢之裔也好  
學博通潔已無瑕以世多進趨廉遜道缺乃著崇讓

論以矯之其略曰夫叙用之官得通章表者有讓賢  
推能乃通之其不能有所讓絕之故人臣初除各思  
推賢能而讓之矣凡讓之文付主者掌之三司有闕  
則以三司所讓最多者用之是三公共選一公為詳  
焉四征有闕則以四征所讓最多者用之是一征闕  
而四征豫讓之詳焉按魏晉故事置征東征西征南  
征北征四將軍各一員分掌重  
晉多以親  
王居之尚書闕以尚書所讓最多者與之以八尚  
書共選一尚書固詳於主者選八尚書也郡守闕則

以郡守所讓最多者用之固詳於王者選百郡守也  
故世爭則毀譽交錯優劣不分難得而讓也世讓則  
賢智顯出能否之美歷歷相次不可得而亂也如此  
愚智咸知進身求通非脩己則無由焉愍懷立以寔  
為師太安初寔遜位至懷帝卽位復授以太尉寔自  
陳年老固辭帝不許左丞劉坦上言曰古之哲王莫  
不師元臣崇養老禮七十致仕所以優異舊德以勵  
廉高之風太尉寔體清素之操執不渝之潔懸車告

老二十餘年臣聞老者不以筋力為禮寔年九十命  
在旦暮而頻上露板宜聽寔所守至是詔曰君年耆  
告老確然難違今聽君以侯就第書曰退老尊之也  
王衍代寔為太尉不書非其繼也

王衍為石勒所敗  
勸勒稱尊號勒怒

曰君名蓋四海身居三公何得言不與世事耶破壞  
天下正是君為使左右扶出夜使人排牆填殺之傳  
言非其繼  
意以此耳朱誕為積弩將軍叛歸劉淵不貶去姓氏

微也且言晉臣之陷於淵者衆不可勝貶也當陽地  
裂三所各廣三丈長二百餘步本志謂地拆裂者臣

下分離不相從之象也言司馬越與荀晞交惡四方  
離散之應也平陽人劉芒蕩自稱漢後誘羗戎僭帝  
號於馬蘭山反胡五斗叟郝索等數千人為亂征西  
大將軍南陽王模遣將淳于定討破皆斬之書曰並  
平之善並曰吉也

經永嘉四年春帝正月二月蜀文碩歸順三月周玘討  
錢璦平之五月六州大蝗地震六月劉聰弑劉和自立  
秋九月王如賊起冬十一月越帥師出許昌將軍周馥

迎帝都壽陽不克

傳曰文碩者蜀李雄之將也殺雄大將軍李國以巴  
西歸書曰歸順嘉之也五月幽并青冀秦雍大蝗食  
草木及牛馬毛皆盡兗州地震本志謂石勒寇汲郡  
執太守胡寵南濟汚是其應也偽漢劉淵死其子和  
嗣位和多猜忌御下無恩其舅呼延攸說和殺其弟  
聰聰覺攻西明闕斬和遂自立書弒者言和雖偽號  
亦諸劉之君也聰殺和而篡其位宜貶大惡王如者

新豐人也遇亂流離至宛會詔促還鄉乃結少年襲  
官軍破襄城於是南安龐寔馮翊嚴嶷長安侯脫各  
帥羣盜應之凡數萬人結石勒為兄弟書賊起言互  
盜盛起不復制矣

按王如後歸王敦為敦所誅

辛卯晝昏至庚子

凡浹旬本志謂夜妖也劉向云晝而暝陰為陽也臣  
制君也班固曰夜妖者風雲並起杳冥與常風同狀  
天戒若曰勿使大夫世官專政而暝晦王室蓋東海  
王越以京師饑羽檄徵天下兵莫有至者率衆出許



昌以行臺自隨官府無復守衛荒饑日甚殿內死人  
交橫府署並掘塹自守盜賊公行枹鼓之音不絕越  
以太尉王衍為軍司越自領豫州牧書出者猶言出  
奔叛其君也故貶去族周馥字祖宣浚弟也理識清  
幹選舉精密累遷至鎮東將軍以東海王越不盡臣  
節每言及厲然又觀羣盜甚盛洛陽孤危乃建策迎  
天子遷都壽春上書曰不圖厄運遂至於此戎狄交  
侵畿內厄逼臣與祖納裴憲華譚孫惠等三十人伏

思大計以殷王有屢遷之事周室有岐山之徙方今  
帝都罄乏不可久居觀今華夷東南為愈北阻塗山  
南抗靈嶽名川四帶有重險之固楚人東遷遂宅壽  
春臣請選精卒三萬奉迎皇駕令裴憲督豫州諸路  
荆揚江湘運米十五萬斛絹十四萬疋以供大駕令  
王浚苟晞共平河朔臣戮力以啓南路皇輿來巡司  
馬越大怒慮其圖已也以兵攻馥馥憂疾而卒書曰  
不克惜其謀合事機而為越所沮其後晉果東遷焉

按本傳元帝後問華譚曰周祖宣何至於反耶譚對曰腹見賊盜滋蔓王威不振故表移都以紓國難若從腹謀西晉未亡也原情豈得為反帝乃悟

經永嘉五年春帝正月密詔荀晞討越乙亥流人杜弢盜據長沙庚午平原王幹薨二月汝南王祐奔建鄴三月戊午越卒宗室三十六王沒于石勒流人汝班及蹇撫賊起于零桂諸郡帝遷都倉垣不克夏六月庚寅荀藩出奔轅轅丁酉劉曜王彌石勒入京師帝蒙塵於南陽荀晞立豫章王瑞為皇太子秋七月浚假立太子置

百官八月劉聰陷長安南陽王模薨九月苟晞及豫章王沒于石勒十一月猗盧寇太原

傳曰帝密詔征東大將軍苟晞討東海王越是晞移檄諸征鎮曰天步艱險亂禍流離元海造逆於汾陽世龍階亂於三魏晞以虛薄委以關東所以藩固王室無俾城壞夫舟楫不固則齊桓責楚襄王逼狄則晉文致討凡我同盟在此行矣及詔討越上表曰越以宗臣寵樹姦黨擅為詔令縱兵寇掠臣祇奉前

詔遣王模陳午等兵詣項龔行天討書曰討越聲其  
罪也流人杜弢本蜀郡人避亂南湘中賊衆推弢為  
牧故書曰盜據長沙平原王幹者宣帝之子也惠帝  
反正以幹為太保當齊王冏之平幹懷百錢見冏曰  
倫逆亂義舉是汝之功今以百錢賀汝雖然大勢難  
居不可不慎及冏誅幹哭之慟曰宗室日衰此兒最  
可人復害之自今殆矣東海王越往視幹幹閉門不  
通使人謝遣而自於門隙窺之當時莫能測其意者

年八十書薨得禮也汝南王祐者亮之孫也祐立為  
威王遇中原亂南渡江依元帝書奔以明內難也越卒者  
何東海王晁於項也曷謂晁於項而書卒曰罪盈而  
死天下不與其為王也越初卒秘不發喪遺命襄陽  
王範統其眾歸東海會石勒追及于寧平焚越尸柩  
曰此人亂天下吾為天下報之焚其骨以告天地經  
書卒罪宜誅爾三十六王者何曰越既死其子毗自  
京邑同宗室子弟出奔遇石勒自武陵西河而下皆

被害餘王陷於勒書三十六王言宗室盡沒矣沙班  
蹇撫二賊起湘州虜其刺史苟眺破零桂東略武昌  
殺安城太守郭察邵陵太守鄭融衡陽內史滕育書  
曰諸郡言賊勢大也苟晞表請帝遷都倉垣帝將從  
之宮中及黃門戀貨財不欲出至是饑甚人相食百  
官皆流亡十八九帝召近臣將行無車輿步出西掖  
門至銅駝街為盜所掠不得進而還書曰不克計窮  
無為矣苟藩者勗之子也時為司空聞劉曜等犯京

邑藩先出奔轅轅不書司空貶也身為三公不能安  
帝室掃群盜而先自亡去非社稷臣也帝蒙塵于平  
陽者何曰劉聰僭據平陽及劉曜入京師帝開華林  
園門欲幸長安為劉曜所追及百官士庶死者三萬  
餘人執帝送歸平陽劉聰以帝為會稽公古者天子  
蒙塵於外國史哀之辭不忍書其囚執豫章王端者  
清河王暹之子也兄詮為皇太子以端封豫章會洛  
陽陷沒端東奔苟晞立為皇太子

按本史端立七  
十日沒于勒

王



浚者司空沈之子也領幽冀都督假立皇太子其實

為妄將謀僭號故削去其姓貶偽假也

按本傳浚為石勒所執責

之曰不忠于晉積粟五十萬不賑百姓

南陽王模者高密王泰之子也

有聲稱於宗室進位太尉洛陽陷降於劉粲為聽所害書薨終之以王禮也苟晞及豫章王沒於石勒者先是豫章王東奔苟晞承制錄尚書事居蒙城勒執晞殺之及端亦遇害端與晞同書沒傷端為晞所禍也猗盧者孰謂曰匈奴種也其先曰神元分國為三

部一曰昭帝神元統一部居上谷之北濡源二曰桓  
帝居代北參合陂三曰穆帝猗盧居定襄北盛樂城  
其後猗盧強盛總攝三部至是攻新興鴈門劉琨不  
能制自稱三部大人蓋後魏拓跋之先書寇太原言  
夷狄深入中國也

經永嘉六年春帝正月帝在平陽二月壬子日有蝕之  
癸丑琅邪王睿檄四方討勒夏四月丙寅將軍山簡卒  
秋七月木火金聚牛斗九月詔猗盧為代公辛巳雍州

刺史賈疋敗劉粲長安人立秦王鄴為皇太子

傳曰帝在平陽王業已淪也然歷數猶存故元經書

年以永嘉書春以帝正月書劉聰偽邑為平陽存其

主而抑偽號也

劉聰改元嘉平代西晉初號漢也

壬子日蝕本志謂

秦王鄴於長安代帝監撫宗廟而帝蒙塵不能反正

之象也琅邪王卽元帝也因洛之亂渡建鄴荀藩等

推王為盟主乃移檄四方共討石勒不書姓以真主

討偽亂必貶偽以成文也山簡者何曰吏部濤之子

為征南將軍鎮襄陽江漢歸附或宴會僚佐勸簡作樂簡曰社稷傾覆不能康正晉之罪人也何樂之有因流涕慷慨未幾卒書官而卒賢之也歲星熒惑太白聚於斗牛吳分野東晉中興之應也劉琨鎮并州時劉粲寇晉陽又太原太守高喬降於粲於是琨奔長山乞師於猗盧乃表猗盧為代公賈疋者太尉詡之孫也累遷雍州刺史率兵三萬復長安劉粲聞之使劉曜來戰疋破之曜中流矢追至甘泉書官不書

詔命言足勇略有復晉之志故特書以褒之秦王鄴者吳王宴之子也秦獻王簡無後以鄴嗣封賈疋既破繁曜三輔小安乃與衛將軍劉芬京兆太守梁總共奉為皇太子書長安人不書官名者言民思晉主關輔厭亂眾欲立皇太子以平寇亂猶春秋書衛人立晉眾也

經永嘉七年春帝正月丁亥聽弒帝崩于平陽夏四月皇太子卽位於長安愍帝建興元年丙午懷帝舉哀壬申大赦改元建興五月壬辰詔琅邪王睿都督陝東南陽王保都督陝西六月石勒陷山東九月荀藩薨冬十月荆湖陶侃討賊杜弢己巳大雨雹十一月流人楊武陷梁州十二月河東地震雨肉

傳曰劉聰大會使帝著青衣行酒侍中庾珉號哭聰惡之乃弒帝書崩于平陽言非其所也春秋書魯昭公薨於乾侯傳曰失其所也書聰弒帝者責在後君必討弒君之賊也太子鄴卽位於長安不係於建興

元年而係於永嘉七年何也曰春秋八公卽位於六公之傳遭喪繼位每年正月則改元正位百官以序國史書卽位於策以表之也杜預曰天子之喪制嗣子位定改元必須踰年此繼父之業不忍變於中年若六月癸亥昭公之喪至自乾侯戊辰定公卽位此則國史直書不須係改元而後書卽位也漢魏而下則不然旣立年號又復易之元經依晉史舊文實書月日而已故懷帝正月崩于平陽四月愍帝改元繼位皆舊史之文是以元經或因而錄之或改而筆之故曰筆則筆削則削古之道也五月壬辰詔曰陽九百六之厄雖盛世猶或邁之况朕幼冲續承洪緒昔周公分陝姬氏以隆平王東遷晉鄭是輔二公掃除鯨鯢奉迎梓宮克復中興琅邪王先為鎮東大將軍乃進位左丞相都督陝東諸軍事南陽王保者南陽王模之子全有秦州之地隴右氏羌皆從焉乃進位左丞相都督陝西諸軍事各因其所鎮而任之順也

六月石勒攻兗州害刺史田徽由是山東郡邑皆陷  
於勒荀藩者司徒勗之子也遷至司空帝為太子時  
以藩世臣也令攝國政遇亂奔滎陽卒於開封書薨  
不書官貶其生不貶其死也

生無功於君即不書官以貶也死得令終即書

以全陶侃為荊州長史元帝見之大悅遷武昌太守

杜弢杜曾賊起攻侃於沔口侃急走入船獲免不書  
敗嘉侃之節終能平賊不欲其敗也故不書敗已已  
大雨電本志謂盛陽雨水而陰氣脅之轉而為電劉

向曰陰脅陽董仲舒曰臣脅君之應河東雨肉者肉妖也天下之亂河東妖孽尤為甚焉

經建興二年春帝正月己巳黑霧五日辛未日殞於地又三日相承自西而東三月石勒陷幽州殺王浚五月西平公張軌薨六月劉曜寇新豐將軍索綝破之秋七月劉曜逼京師將軍麴允破之

闕

中郎將劉寅克頓丘

傳曰黑霧著人衣如墨連夜凡五日而止本志謂時

君昏耗之妖也曰隕者日不隕也有妖物象日之形  
墜於地爾三日相承者亦妖氣映日而人昧之有三  
焉五年正月庚子三日並照虹蜺彌天皆此妖也天  
晴卽無之本志謂元帝渡江劉聰李雄各據曹劉舊  
疆三分之應也石勒陷幽州牧王浚大罵而死不書  
官貶其逆與賊同耳張軌者少以儒學顯名永寧中  
為涼州刺史化行河右摯虞曰天下方亂有避難者  
惟梁土耳執司馬楊胤言曰東羗韓雅殺秦州刺史



張輔明公仗鉞一方宜懲不恪春秋之義諸侯相滅  
桓公不能救則桓公耻之雅聞之降軌大發兵破王  
彌劉聰有功進位司空封西平公遣使朝貢歲時不  
絕朝廷嘉之俄患風遺令曰文武將佐當盡忠規務  
安百姓上思報國下以寧家善相和遜以聽朝旨卒  
年六十謚曰武公而薨褒忠勲也索綝者司空靖之  
子舉秀才累遷至安西將軍懷帝蒙塵綝糾合義衆  
破賊黨立秦王為主劉曜及趙苻冠新豐綝擊破賊

書之告捷也七月曜冉復逼京城麴允討破之允金城人與游氏世為豪族而州語曰麴與游牛羊不數頭言多也累以戰功遷雍州刺史劉曜趙冉逼長安允討之殺趙冉書告捷也劉寅克頓丘頓丘石勒偽署太守邵攀所居也詔北中郎將劉寅往克之斬邵攀書克得雋曰克杜預曰不期而薄之取勝故以克為文

按春秋鄭伯克段于鄆左傳曰如二君故曰克此則言凡敵相等勝之曰克也

經建興三年春帝正月盜殺晉昌太守趙珮二月猗盧

為代王四月將軍周訪討杜弢張彥六月發漢二陵辛  
巳敕雍州修復陵廟秋七月劉聰寇上黨劉琨救之王  
師敗績八月荊州刺史陶侃擊杜弢湘州平冬十二月  
涼州張寔進玉璽

傳曰凡稱盜不名者微也趙珮為晉昌太守遇亂為  
群盜所殺書官憫王臣也春秋之義書盜殺鄭公子  
發公孫輒傳云書盜非大夫士庶人微者莫得獲其  
名耳

按春秋書盜或無名或時稱名者盜殺衛侯兄  
擊傳曰齊豹為司寇作不義經書為盜今元經

所書盜殺王臣因舊史成文亦言人微不獲其名

猗廬以永嘉六年封代公

至是益強盛中國失道莫能制四夷之僭故曰猗廬

為代王

為者言自為也

以明西晉莫能制其僭也周訪者孰

謂曰潯陽人也與陶侃結為友元帝以訪累有戰功

遷振武將軍詔征杜弼弼作桔槔打官船艦訪以長

岐槍拒之賊將張彥陷豫章訪擊之臨陣斬彥書官

以旌功也六月癸霸陵杜陵及薄太后陵面如生得

金玉不可勝計是時朝廷草創敕收其餘以實內府

不書盜殺者何譏世衰無法又收古陵餘物言非盜  
獨然由國自收之矣劉聰冠上黨先是劉琨下有徐  
潤者琨愛之護軍令狐盛諫琨令去徐潤潤反譖盛  
於琨琨殺之盛子泥奔於劉聰聰以泥為鄉導攻上  
黨又襲晉陽劉琨救之為聰所敗識琨之過也

春秋之法

有譏有貶有闕按劉琨力與夷狄爭戰雖小過不能掩大節故譏之而已

陶侃受元帝節

度以周訪趙誘為前鋒討杜弼破之書湘州平告功  
於元帝也曷謂告功於元帝曰自建興初琅邪王南

渡浙江湘東晉節制而中原否矣舊史以元帝未

紹位故策書赴告且繫之於西晉耳

按元帝永嘉初始都建鄴江東

歸心及愍帝卽位進丞相都督中外諸軍事乃分定江東斬叛者孫弼於宣城又分遣諸將平杜弢於湘州周訪趙誘告功實系東晉張寔者西平公軌之子也玉璽者寔

繼襲梁州有軍士得玉璽其文曰皇帝璽群僚稱慶

寔曰孤常恨袁本初得玉璽諸君何復難耶送於京

書進者嘉其不虧臣節也

按寔聞長安陷大哭臨三日遣將東赴國難及愍帝

崩寔年號猶稱建興此臣節不虧之效也

經建興四年春帝正月三月代王猗盧薨夏四月涼州  
張安遜遣步騎赴京師五月雷照叛降李雄七月劉曜  
攻北地王師不戰而潰八月劉曜逼京師十一月辛丑  
帝蒙塵於平陽十二月己未劉琨出奔於段匹磾

傳曰猗盧雖夷狄事晉封爵于代貢奉不絕生為王  
臣死以王禮故書薨張安遜者何曰張寔字安遜也  
賊逼京師四方阻絕惟寔遣五將東赴國難書字者  
嘉之也猶春秋書邾儀父傳稱者嘉之也雷照者平

夷太守也殺南廣守孟栢以二郡叛降於蜀李雄不  
書太守者言非其守也王師不戰而潰者劉曜攻北  
地麴允麴昌士卒未和故不戰而師衆自散譏將主  
無法所以潰也八月曜逼長安內外斷絕公卿守小  
城自固京兆弘農馮翊上洛四郡之兵不敢進京師  
饑甚人相食死者大半帝膳以麴為粥而已十一月  
帝以羊車肉袒街壁昇觀出降曜以帝為懷安侯故  
書蒙塵於平陽不書降諱也春秋為內諱元經為中



國諱聖人之情一也

按春秋以魯為內以列國為外魯有恥事則仲尼微辭以諱之

其旨非諱魯公而已也痛周公典禮在魯君臣不能秉而行故善則書之惡則諱之語云甚矣吾哀也不復夢見周公此其志也元經以中國為內以四夷為外晉之喪也羣胡亂華臣主屈辱仲淹益傷之不忍書其降曜亦春秋之諱也十二月劉琨為石勒所敗乃奔段匹磾

者何匹磾東郡鮮卑也懷帝朝以為右賢王助國征討假節大將軍劉聰逼洛陽琨與匹磾結盟共討石勒勒攻樂平太守韓據棄城去琨不能救乃奔幽州依匹磾從飛狐道入匹磾見之甚相重書曰出奔者言

內地皆夷狄所有矣

按劉琨奔匹磾自此河東皆陷於石勒矣

經建興五年春帝正月帝在平陽宋哲奔江南二月太守李距破賊劉暢三月琅邪王稱晉王改元建武七月大旱胡蝗冬十一月丙子日有蝕之十二月戊戌聽弒帝崩于平陽劉聰死

傳曰帝在平陽猶居外也宋哲為鎮東將軍當長安之陷也哲與焦嵩竺恢赴國難事不濟南奔元帝書曰奔江南棄中原也琅邪王自永嘉之亂出鎮建鄴

至是因宋哲奔江南宣慰帝詔曰朕今幽塞窮城誠恐一旦崩潰卿詣丞相使攝萬機王素服舉哀乃依

魏晉故事稱晉王改元建武元年

按永嘉元平以後中國士族文物大半奔

江南史筆南朝追書耳今元經但以建興五年盡十二月以全西晉之終焉其實三月以後卽建武之史


也七月大旱曷謂胡蝗曰冀兗青雍四州皆蝗是時石

勒亦浸奪民稼時人語謂之胡蝗丙子日蝕劉聰弒逆之兆也十二日聰大會使帝行酒洗爵晉臣在坐者無不失聲泣麴允大哭乃自殺辛賓抱帝號慟皆

為聰所害書聰弑帝去其姓貶僭逆也于平陽言頓  
失所當以天子之禮終焉則聰死何以不去姓所以  
示貶也及卒則書姓名以彰其罪也聰弑二君賊害  
忠臣不可勝紀君子既貶其生又貶其死以疾惡之

甚乎

偽主薨卒書于  
經者特暴其罪



元經卷二

欽定四庫全書

史部

元經卷三  
四

詳校官編修<sub>臣</sub>范來宗

洗馬臣王坦修覆勘

總校官庶吉士<sub>臣</sub>朱 鈐

校對官侍讀<sub>臣</sub>王家賓

謄錄監生<sub>臣</sub>陳 炳

欽定四庫全書

元經卷三

隋王通撰

唐薛收傳

宋阮逸註

經東晉元帝太興元年帝正月帝卽位三月立皇太子

無傳卽  
明帝也

夏四月戊寅禁招魂塋五月王敦段匹磾殺劉

琨六月帝親幸戊戌立皇子晞為武陵王初置諫鼓謗

木七月戊申詔州牧舉善察惡十一月新野王弼薨庚

申詔公卿上封事新作聽訟觀已卯琅邪王渙薨復立  
昱癸巳詔旌吳賢

傳曰元帝諱睿字景文宣帝曾孫琅邪恭王覲三子  
幼有令聞不顯灼然之迹蕩陰之敗也帝懼禍將出  
奔而月明無由去有頃雲霧晦暝因潜得去成都王  
穎先令諸關無出貴人帝至河陽為津吏所止從者  
宋典鞭帝馬曰官禁貴人汝亦被拘耶吏聽過至洛  
陽迎太妃歸琅邪永嘉初用王導計求鎮建鄴西都



不守帝於三月卽帝位經書正月卽帝位者西祚已  
盡東晉首新故必於大興元年正月卽位春秋所謂  
正始也且明中興始焉招魂葬非古禮也漢魏之術皆  
妄也葬之為言藏也仁人於其親掩藏歸穴不豐不  
儉必約於禮焉延陵季子曰魂無不之此言塋形非  
葬魂矣禁之禮也劉琨旣奔歸段匹磾弟末波納石  
勒厚賂潜欲段匹磾以琨為內應事覺為匹磾所囚  
王敦密勸匹磾害琨縊殺之書曰王敦段匹磾殺劉

琨言二兇同惡殺賢人也帝親雩旱也春秋凡啟蟄

而郊龍見而雩始殺而嘗閉蟄而蒸襄五年秋大雩

二十八年八月大雩皆傳云旱也今帝親雩善得禮

也

按西晉四主凡五十二年大旱多矣未嘗親雩以祈農事今元帝中興能修雩祀誠得禮矣雖非龍

見於時無

皇子晞第四子封武陵王正也

事迹在武帝初太元六年

置諫鼓謗木者書賢君能復古道有意於治矣詔州

牧舉善察惡戊申詔云州牧刺史相檢察不得阿私

長吏有志在奉公而不見進用者當受閭塞之責此

明東晉之治先乎旌別矣新野王弼者汝南王之子  
書薨得禮也十一月詔曰災異屢興咎徵仍見壬子  
乙卯雷震暴雨天災譴戒彰朕不德公卿各上封事  
具陳得失朕將親覽焉聽訟觀者外朝別館也帝始  
精國政慮民訟壅隔特作此觀古之道也堯聞衢室  
聽於民其  
是之謂乎琅邪王渙帝子也既踐祚以子哀奉琅邪恭王  
祀哀早世更以皇子渙為琅邪王王薨復立皇子昱  
為琅邪王經言琅邪中興之國祀不可絕故書曰復

立昱重繼也癸巳詔曰漢高經大梁美無忌之賢齊  
師入魯修柳下惠之墓其有高德名賢或未旌錄者  
具條例以聞書元帝得古義也舜紹堯興滅國繼絕  
世舉逸民天下歸心焉周武王克商封比干之墓式  
商容之間斯皆聖王初興必賴賢獻共格于治元帝  
渡江首下此詔宜也

經太興二年春帝正月迎梓宮於平陽不克二月徐龕  
討平賊周撫夏四月陳川以浚儀叛徐龕以太山叛陳

安以秦州叛五月將軍祖逖討石勒戰於浚儀甲子刺史周訪討平賊杜曾七月太常賀循卒冬十月十一月石勒僭號趙南陽王保稱晉王於祁山

傳曰愍懷二帝皆播遷于平陽崩于劉聰皆不書葬言不得其禮終也至是正月丁卯崇陽陵毀五月癸丑又大陽陵毀帝素服哭三日乃遣將軍梁湛修復

山陵迎梓柩于平陽書曰不克存孝思也

按崇陽陵晉文帝陵

也大陽陵惠帝陵也二陵在西都為劉曜所發掘書曰毀言陵自毀不忍書發也

賊周撫者

一名為彭城内史

救沛國內史

至是太山太守徐龕討平

之斬撫傳首京師書告功也

時以建鄴為京師

四月陳川徐

龕陳安三者同書叛言中原未能平也平北將軍祖

逖與石季龍戰于浚儀王師敗績書皆陣曰戰不書

敗者嘉祖逖之忠有志為晉平中原君子不欲其敗

也故諱其敗績甲子安南將軍周訪討杜曾之賊戰

於武當斬之書功也賀循者其先慶氏避漢宣諱改

賀氏始為琅邪王司馬為參佐隨帝南渡加開府儀

同三司既卒旌中興之臣也石勒據襄國劉曜遣使

持節署勒進爵趙王封二郡如曹公輔漢故事書僭

號者連劉曜皆貶之也

案石勒載記張賓等上疏請即皇帝位合二十四郡為趙

國內復冀州之境南至孟津西達龍門東至河北至關大單于以撫百蠻勒刃許之南陽王保

者南陽王模之子也愍帝初立以保為右丞相至是

自稱晉王全有秦州之地涼州張寔立之也

按晉史保傳曰

保降劉曜而死秦州刺史陳安迎保喪天子禮葬於上邽亦謚曰元帝

經太興三年帝正月二月 闕

季龍寇厭次刺史邵續

戰沒三月慕容廆來獻玉璽夏四月枉矢流於翼軫五月太子詮遇害於平

闕

徐龕率衆來降六月盜殺涼

州張寔弟茂立將軍祖逖破石勒軍

闕

八月辛酉

遷神主於太廟將軍周訪卒皇太子釋奠於太學九月徐龕復叛於趙

傳曰邵續者孰謂曰散騎乘之子也王浚假

闕

樂陵太守屯厭次石勒既破王浚獲續子又遣人

闕

續續泣曰我出身為國豈得顧子為叛臣遂與段匹磾



共攻勒多勝捷帝以續為冀州刺史為石季龍所襲  
被執續呼其兄子竺曰吾志在雪國難以報所受不  
幸至此汝輩自勉奉匹磾為主勿有二心季龍送續  
於勒勒讓之曰夷狄不足為君耶何無上之甚也續  
對曰晉末饑亂奔控無所故囚保合鄉宗庶全老幼  
言歸於晉仍荷寵授期盡忠節實無二心恐不容於  
明朝矣昔周文王生於東夷大禹生於西羌帝王之  
興當何常耶囚去真卽偽不得早扣天門者大王負

囚囚不負大王也勒曰忠於其君者吾所求也竟遇害書官以歿嘉其忠也燕慕容廆時平州刺史崔亮陰結高麗及宇文段國伐廆欲分燕地廆與戰入宇文之營獲皇帝玉璽玉紐遣長吏裴嶷送於建鄴書來獻嘉廆不忘晉舊也枉矢者何流星類也本志謂凡星自上而降曰流自下而外曰飛大者奔蛇行者姦事也枉矢類流星而色蒼黑蛇行望之如有毛目長數尺主反萌亦為以亂伐亂

按翼二十三星天之樂府又主夷狄軫四

星主冢宰輔臣又主車騎今枉矢流於  
其間象羣胡亂中華又有南侵之應  
太子沒於劉

聰至是遇害帝三日哭之禮也徐龕先以太山叛於

趙至是偕石勒率衆來降

闕

官貶龕反復雖降不

為可信失盜殺張寔者何曰京兆人劉引挾左道客

居涼州燃燈懸鏡於山穴為光受道者千餘人寔左

右皆事引引鄉人閭沙牙門趙仰引謂曰天與我神

璽當王涼州沙仰密與寔左右十餘人謀殺寔奉引

為主寔潛知其謀乃收引先殺之而沙等不之知以

其夜害寔書曰盜微者無名氏也寔子駿年幼故衆立其弟茂茂但受涼州牧而以兄子駿為西平公書

茂繼立者賢之也

按茂太寧三年卒臨終執駿手曰先人以孝友見稱世執忠順今雖

華夏大亂汝當謹守臣節上不負晉主下保百姓吾氣絕之日白衾入棺無以朝服以彰吾志故書曰賢

祖逖字士雅世吏二千石為北州舊姓性放蕩不修儀檢元帝南渡逖避亂淮泗帝用為徐州刺史逖渡江中流擊楫而誓曰祖逖不能清中原而復濟者有如大江屯於淮陰鑄兵器而後進石勒遣將陶豹來

戰逖使韓潛追擊於汴水豹宵遁由是黃河以南盡  
為晉土不言破陶豹而書破勒軍大其功也遷神主  
于太廟時初建宗廟舊儀多闕或以惠懷二帝應各  
為世則潁川世數過七宜在迭毀事下太常賀循議  
曰商之盤庚不序陽甲漢之光武不繼成帝懷帝上  
繼太祖不繼惠帝弟不繼兄惠帝尚在太廟而懷帝復入  
數則盈八八世其名一也盈八之理由惠帝不出非上祖宜  
遷也書遷神主言遷毀議定猶八室也天子七廟古之道也其間

有兄弟繼立則於義非二世按晉元帝太廟七世即自豫章太守量量生頴川太守雋雋生京兆尹防防生宣帝懿懿生景帝師師傳文帝昭昭生武帝炎炎生忠帝哀哀生懷帝熾武帝孫鄴是為愍凡九神主除景帝雖為文帝兄弟義著祖宗百世不毀則是上自頴川次京兆及宣景文武惠懷愍凡八室神主昭穆始也訪者字士達家潯陽與陶侃結友前後征討多

戰功智勇過人與中興名將李矩郭默相結慨然有平河洛之志王敦雖懷逆謀然終訪之世不能為非年六十一卒贈征西將軍書官而終貴之也太子釋奠之禮久廢江南文物始修於茲有以見人君先齒

冑之禮由大學而興乎徐龕復叛於石勒不書石勒而書趙者言中原分裂猶敵國也故書國且言晉衰矣

經太興四年春帝正月二月徐龕來降鮮卑末波獻信璽癸亥日閏三月置諸經博士夏四月段匹磾沒于趙七月戴若思劉隗王導都督司空八月常山崩九月將軍祖逖卒十二月慕容廆為都督幽平諸軍事

傳曰徐龕復來降其去也可貶其來也可恕故君子

亦書之以懷後至者也鮮卑末波者段匹磾從弟也  
襲匹磾而附石勒及中興末波奉送皇帝信璽于我  
鮮卑國也未波是其名也若春秋書長狄僑如之類  
別無官族褒貶之例癸亥日閹者何曰本志謂太興  
元年乙卯日夜出高三丈有赤青珥四年二月癸亥  
日閹三月癸未日中有黑子皆帝寵幸劉隗而擅威  
福王敦囚之舉兵犯京師禍及忠賢之兆也置諸博  
士博士秦官也漢因之九經皆有博士魏晉學校不



絕元帝中興置周易儀禮公羊三經博士書曰諸經

皆當備置也

逸按本史經任博士者毛詩卽有文立周禮卽有陳郡春秋三傳有劉兆二禮

有范隆尚書有董景道周易有績咸五經音訓有徐邈此皆晉儒之著聞者也段匹磾者鮮

卑人王浚表為遼西公後遷幽州刺史至是與石季

龍戰敗被擒於襄國嘗著朝服持晉節乃遇害書沒

於趙趙晉敵國也匹磾不書官貶也曷謂貶曰匹磾

始與劉琨結盟事晉琨窮來歸之而匹磾害琨故旋

踵亦被禍大計一虧小忠無益也

按劉琨傳王敦使匹磾殺琨又恐琨

衆反已遂矯詔收琨琨聞敦使至謂其子曰處仲戴  
有使來而不告我是殺我也因獻欵為匹磾縊死

若思劉隗王導同書者何曰皆佐命功臣也若思屈  
於王敦劉隗奔於石勒各不保其終王導者誅王敦  
有大勲於東晉然同書者舉其始所以待其終同其  
恩所以異其效爾若春秋書齊侯宋公鄭伯許男滑  
伯滕子同盟於幽但書其同盟無復以爵先後為義  
也逸按戴劉王三賢並佐命者王敦傳云帝用關  
劉隗戴若思外以討胡為名其實禦敦是也常  
山崩書異也若春秋書梁山崩杜云繫其所災不繫

其國梁山不書晉者名山不以封也今經所書者記

災異也

言山有朽壞而崩非災焉記異者蓋言一時之異無繫災咎也

祖逖

字士雅范陽人

元帝中興逖有振復之志誓以期清中原遷豫章刺

史累破石勒進逖為鎮西將軍石勒不敢窺兵河南

逖據武牢恐南無堅壁乃率眾築壘未成而疾俄而

卒於雍丘年五十六豫州士女若喪考妣書官以卒

嘉其忠也慕容廆為都督幽平諸軍事初廆元康中

居大棘城

大棘城顯項之墟也

為鮮卑都督累有戰功至是受

都督幽州軍事平州牧書于經懷外夷也

經永昌元年帝正月改元王敦反三月帝大閱于郊外  
夏四月王敦自為丞相殺戴若思周顗五月周慮反殺  
將軍甘卓六月旱秋七月太山陷於趙冬十一月太尉  
荀組薨閏月乙丑帝崩於內殿

傳曰王敦反者何司徒王導從父兄也潘滔嘗曰處

仲

敦字

蜂目已露但豺聲未振爾若不噬人亦為人

所噬東海王越以敦為揚州刺史元帝興以敦為帥

時劉隗用事頗踈間王氏帝惡敦而畏之遂引劉隗  
刁協為心腹敦益不平至是舉兵內向以誅劉隗為  
名帝下詔曰王敦憑恃寵靈敢肆狂逆方朕太甲欲  
見幽囚今親帥六軍以誅大逆有殺敦者封五千戶侯  
三月帝大閱者帝親被甲徇六師於郊外將伐王敦  
此先閱兵也春秋桓六年八月壬申大閱傳云簡車  
馬也周禮大司馬之法仲冬教大閱戒衆庶脩戰法  
萊所田之野陳車徒斬牲以誓曰不用命者斬之鼓

戒三關車三發徒三刺若大師則掌戒令及戰則巡  
陳視事而賞罰之大師謂王親征伐也書曰帝大閱  
言得禮也王敦自為丞相非帝命也敦既克石頭乃  
收周顗戴若思曷謂與逆臣同貶曰顗與若思帝委  
重兵不能善謀討賊而自取夷戮亦猶一賊耳故皆  
貶宜矣

春秋書趙盾不能討賊也况周顗戴若思各  
領兵奉王命討敦而不克雖不書官亦可貶

其無功

甘卓字季思西晉之亂避難棄官東歸遇陳敏

後討陳敏有功累遷梁州刺史鎮襄陽王敦向關也

卓露檄遠近陳敦肆逆率所統討之雖懷義正而性不果毅軍次豬口累旬不前敦大懼遣使求和謝卓曰君旋軍襄陽當更結好卓卽還軍會襄陽太守周慮承敦意詐言湖口捕魚乃襲害卓書曰周慮反者言慮受晉官陰附王敦殺害忠黨故先書其反而後殺卓疾惡甚也卓書官貴之也七月石季龍攻太山執其守徐龕不書守守賤不足書焉惜太山琅邪之國陷於賊不復歸矣荀組者荀藩之弟也

字大章惠帝

西幸以組為河南尹兄弟貴盛懼不容於世雖居大  
官但諷議而已洛陽陷組藩皆出奔愍帝時組藩共  
保滎陽之開封元帝與組移檄勸進大興初逼於石  
勒乃渡江錄尚書事遷太尉書官以薨貴舊德也乙  
丑帝崩於內殿終以正也帝為王敦所逼下凌上辱  
憂憤而殞故葬速禮有闕如也按本史云晉室紛亂  
皇輿播越天命未改  
人謀叶贊經路區區僅全吳楚終以下凌上辱憂  
憤告謝蓋恭儉之德雖充而雄武之畧不足也

經明帝太寧元年春正月帝即位癸未黃霧四塞蜀李



驤破譙登越雋漢嘉降於蜀二月葬元皇帝壬申隕霜

殺穀

無傳按春秋霜殺草猶書况麥穀乎

三月饒安東光安陵縣災王敦

求徵五月京師大水六月壬子立皇后庾氏將軍陶侃

平交州梁碩秋七月劉曜滅陳安八月石季龍殺青州

刺史曹嶷

傳曰明帝諱紹字道畿元皇帝長子也建興初立為

皇太子永昌元年閏十一月庚寅卽皇帝位經書太

寧元年正月帝卽位者端其本始也

按穀梁春秋正始所以端本也

癸未黃露本志曰是時王敦擅權謀逆之兆也李驥  
者李特之弟也特子雄僭號以驥領兵征涪執梓潼  
太守譙登又越雋漢嘉等郡皆下之書曰降於蜀蜀  
王雄盛開拓漸廣也饒安諸縣災春秋言內災繫宗  
廟社稷則書外災來告亦書之元經天下之書也無  
分內外凡天火譴戒則書焉饒安東光安陵災燒七  
千餘家死者萬五千人此災尤大者也本志謂信道  
不篤或燿虛偽讒夫昌邪勝正則火失其性雖興師

不能救是謂火不炎上蓋王敦威侮朝廷多行無禮  
極陰生陽之禍王敦自為丞相專朝政將謀篡位諷  
朝廷徵已帝不得已以手詔之敦遂起兵下蕪湖窺  
鑿而動也五月大水春秋之例曰平原出水為大水  
按桓元年秋大水十三年夏大水今夏  
大水亦傷禾稼故元經因舊史書災興 皇后庾氏者  
庾璵之女也明帝卽位立為皇后冊曰妃庾氏昔承  
明命作嬪東宮履信思順以成肅雍之德正位閨房  
以著協恭之美崇嫡明統載在典謨宜建長秋以奉

宗廟使使持節兼太尉授皇后璽綬母儀天下潛暢

后教其敬之哉經書正也

按琛贈驃騎大將軍儀同三司兄亮管詔命官至中

書令交州賊梁碩者攻陷交州殺刺史王諒平南將軍

陶侃遣將高寶討碩斬之傳首京師告功也陳安者

何曰初為劉曜將也遣安擊張春滅之安于是叛曜

至是曜討安于隴城殺之書曰劉曜滅陳安兩名猶

春秋諸侯相滅非王命而滅之者皆為不道也故兩

書名俱貶也

按春秋小國相滅齊威公不能救則威公恥之故狄滅邢滅衛而齊威以邢遷

夷儀遷衛楚丘所以興滅繼絕須伯者行之

且言晉不王時無伯政使亂

臣賊子互相屠滅有足傷焉

司馬九伐之法其最重者內外亂鳥獸行則滅

之無是之罪明不可滅也劉曜滅陳安陳安殺張春張春弑晉王此三者皆非法互相賊害元經傷之矣

曹嶷者建武初為青州刺史與并州劉琨幽州段匹

磾冀州邵續兖州邵續兖州劉演皆附元帝勸進為

晉藩屏至是趙將石季龍攻陷青州嶷遇害稱官見

殺閔忠臣也

經太寧二年春帝正月帝臨朝懸而不樂石季龍寇兖

州三月劉曜寇魏興南陽夏五月王敦矯詔以含應為將軍七月壬申帝躬率六軍討王敦敦戰敗憤卒丁酉帝還宮大赦賞功臣有差冬十月王導為太保西陽王秉為太尉豫州祖約保壽陽十二月帝謁建平陵

傳曰帝諒陰始臨朝行元會饗宴禮具宮懸不考聲言天子喪制行告禮故懸而不樂權宜也趙將石季龍攻我兗州刺史劉遐退保泗口三月劉曜遣其將康平攻我魏興及南陽言二趙日侵晉也敦矯詔以

其子應為武衛將軍兄含為驃騎大將軍自樹其族  
將謀篡也丁卯王導為大都督溫嶠為中壘將軍卞  
敦守石頭城應詹為護軍郗鑒行衛將軍都督從駕  
庾亮領左衛卞壺行中軍將軍王邃祖約劉遐蘇峻  
陶詹等環衛京師七月壬申帝躬率六軍出次南皇  
堂至癸酉夜募闕壯士卒千人渡水掩其不備大破  
之斬敦前鋒何康於是敦憤惋而卒乙未敦眾濟水  
至宣陽門劉遐蘇峻自南塘橫擊大破之賊黨悉平

丁酉帝還宮大赦惟敦黨不原封王導為始興郡公  
溫嶠建寧縣公卞壺建興縣公庾亮永昌縣公劉遐  
泉陵縣公蘇峻郡陵縣公郝鑒高平縣侯應詹觀陽  
縣侯趙盾湘南縣侯卞敦益陽縣侯其餘封爵各有  
差賞平賊之功也王導西陽王羲書並命得賢輔也  
祖約為豫州刺史是時石勒將石生屯洛陽謀攻我  
豫州約退保壽陽晉日削也十二月帝謁建平陵行  
大祥之禮古者不封墓至漢而下帝王陵皆立廟大



祥謁廟以明孝思行之可也

經太寧三年春帝正月二月戊辰復三族刑三月壬辰

立皇子衍為皇太子癸巳徵任旭虞喜為博士闕四月

詔議政道論直言五月陶侃都督荆湘雍梁州大旱自

正月至于秋月七月郗鑒都督青徐二州詔興滅繼

絕及五郊祀秋八月戊子帝崩于東堂九月癸卯太后

臨朝辛丑葬明帝於武平陵冬十月癸巳朔日有蝕之

傳曰復三族刑惟不及婦人本志謂謀反大逆夷其

三族不在律令所以嚴惡類也又云女子有三從之義無自專之道若父母有罪而刑已出之女或夫黨坐誅又有隨姓之戮一人之身內外受刑令女既嫁則為異姓之妻如或產育則為他族之母嬰戮

闕

非所以哀矜柔弱故三族刑因王敦大惡之後行

闕

以戒其惡也不及婦人矜無辜也皇子衍長嫡也為皇太子正也處士任旭字次龍臨海人元

闕

書召才出

事具隱逸傳

虞喜字仲寧

闕

賀循為司空先達貴顯每詣喜自云不能測也

問

王導建學校下詔曰夫興化致治莫尚乎崇道教

問

明退素也任旭虞喜並潔靜其操歲寒不移研精典

墳前雖不至今更以博士徵之

事具儒林傳

四月詔曰大

事初定其命維新宜令太宰司徒以下詣都堂參議

政道諸所因革務盡事中又詔曰苟有一言亮正予

違汝弼望共勗之史言明帝聰明有機斷尤精物理

雖享國日淺而規模宏遠觀二詔可知矣陶侃都督

荆襄等四州本史謂明帝分上流之勢強本弱枝國之善謀也却鑒自明帝時假節鎮合肥帝仗鑒為外援既平王敦又委鑒東北以禦趙寇也詔曰三恪二王世代所重興滅繼絕政道所先又宗室哲王有功勛於大晉佐命功臣開國昭王誓同山河苟廢絕禋祀甚用傷懷主者詳議應立後者以聞又詔曰郊祀天地帝王之重事中興以來惟南郊未嘗北郊故四時五郊之祀都不復設載在祀典應望秩者悉廢而

未舉主者依舊詳處二詔皆古之道也書于經足以  
為萬世法矣八月壬午帝不豫召太宰西陽王羨司  
徒王導將軍陸曄丹陽尹溫嶠受遺詔輔太子丁亥  
詔曰昔周公匡輔成王霍氏扶育漢昭義存前典功  
冠二代豈非忠臣之道乎敬聽顧命受任託付雖有  
內外其致一也不有行者誰扞牧圉譬若唇齒表裏  
相資百辟卿士其總已以聽冢宰保幼冲人戊子帝  
崩于東堂正其終九月太后庾氏臨朝稱制帝幼故

也

按明穆傳曰羣臣奏天子冲幼宜依漢和熹皇后故事辭讓四乃臨朝后兄亮詔命公卿奏事稱皇

太后問

陛下

辛丑葬明帝於武平陵禮也十一月日蝕

本志謂癸巳朔日蝕在卯至斗斗吳分也蘇峻作亂

之兆也

按蘇峻平王敦有大功及受顧命峻不預以此怨望而庾亮倚后威欲害峻於是謀逆故

日蝕者后不明也

元經卷三